

Dä Minschesun

(Predigt „Mess op Kölsch“ vum 18.2.2012 – Zelebrant Pfr. Heribert Heyberg)

Do hann se sich jo wirklich jett enfalle looße – die 4 Mannslück do en däm Jewöhl in Kafarnaum!

Met aller Jewalt wollten se dä ärme Kähl zom Jesus bränge.

Un doför mohten se nit nur e paar Panne vum Daach avrieße!

Se mohten e jroß Loch en dä steinhade Deck us Lehm schlare, um su da ärme Höösch op singer Bahr an Jesus dran zo brenge! In genau für sing Föhs zo läje.

Dat Einzige, wat Jesus zeich, es e jruß Staune övver dat unbändige Vertraue, dat die Vier zo im han.

Et wohr jo wirklich met de Häng zo jriefe, wie fess se ahn dä Joddesmann jläuve dähte.

Un dat Vertraue (nit eijentlich dat zo däm Kranke), brängk Jesu dozo, zo sage:

„Ding Sünd es Dir nohjlosse!“

Wullt dä dat äver überhaupt hüüre? Wat dä sich doch secher vun ganzem Hätze wünsche däht, wor doch: widder op de Bein zo kumme, eromloofe zo künne wie alle Lück, - neu in et Levve zo jonn.

Ävver Jesus es ne jode Dokter für Liev un Siel! Hä süht, dat et en uns Minsche Lähmunge jitt, die bes en de Siel krank maache!

Do jitt et Lähmunge zweschen de Minsche, wo de Lück sare: „ Zwische denne läuf nix mieh“.

Dü Jrund litt nit en de Bein, äver em Hätz!

Für allem jitt et 1000 Zoote Angs, die Minsche lahm maache.

Et jitt och Lähmunge zweschen uns Minsche un unserm Herrjott – do, wo Funkstell es – wo et kei Vertraue mih jitt – un kein Dankbarkeit.

Vielleicht es dat alles dä Jrund für dem Jesus sing Therapie, dä anfängk: „Ding Sünde sin dir verjovve!“

Die Pharisäer, die in om Peck hatte, dachten: Wie kann dä esu jet sage:..“ Die miehste Lück däten hüek sage: „ wieso Sünde...“ *„Wir sind doch alle kleine Sünderlein, s’war immer so..“*

„Sünd und Schand“ – wie mer fröher säht – dat jitt et scheinbar nit mieh. Dobei jitt et jenoch Saache, wo mer sage muss: „dat es doch en Sünd un Schand“: - en d’r Arbeitswelt, - en d’r Politik, - en d’r Kirch und och - en d’r Familich!

Sünd und Schand, wieviel Esse fott jeschmisse weed unn verkütt!

Wie brutal Minsche meteiander ömjonn.

Wie kleine Lück usjenötz wäade.

Wie de Böverschte Ihr Maach usnötze.

Wie jedankenloos mer all manchmal Minsche behandele.

Däm Jesus sing Diagnose un Therapie es alles Andere als passé.

Jederein muss sich do secher an sing eigene Naas – och sing eigene Pappnaas – packe!

Die Schriftgelieherte fromme Mannslück, die sochen nit dä ärme Höösch und sing Malätzichkeit und Nuud.

Die hatten och keene Bleck för dat joode Hätz vun dä vier Kääls, die esu Vertraue hatte en dä, dä sech dä „Minschesohn“ nannt. Ihr Thema wor nur dat eene:
„Wie kütt dä dozo, sich ahn Herrjotts Stell zo platzeere? Mer wääde jo sinn, wat sing Vollmaach ess!

Und die zeig Jesus en dä drei Wööd:

Stand op! Nemm ding Bahr! Jangk noh Hus!

Was för e Wood för dä ärme Höösch, dä schon Johr für Johr platt wie e Brett do looch!
Dem sing Levve fassjewaase wor ahn sing Bahr.

Met de Johre hüren och die Krankebesöcker op un et weed einsam. Dann es mer nirgendwo mieh ze Hus!

Un jetzt dat Wood von däm Minschesun:

Hä kunnt opstonn – obräch – un en sing Levve jonn.

Hä kunnt sing Probleme unger de Ärm nemme!

Hä kunnt de Angs, die esu jelähmt mäht, hinger sich losse.

Hä kunnt neu vertraue en sing Levve un en dä Minschesun,
dä im e neu Levve jejobve hatt – neu an Liev un Siel.

De Lück dröm eröm – säht Markus – woren us dem Hüsje.

Se benedeiten dä Herrjott un saaten: Su jett hammer noch nit jesinn.

Un mer - leev Lück he - hück ovend – wie jeiht et üch met däm, wat mer jehoot han?
Wo fing Ihr üch dodren widder? Is dat nur e schön Verzällche vun domols – vielleicht ja nit su jemütlich för Fastelovend?

Et künnt jot sin, dat manch ener ehrlich sage muss: Eijentlich bin ich esu krank – esu jelähmt vun Sorje un Angs in minger Siel – stief un hatt em Hätze.

Op dä hück dä Moot hätt, sich drare zo looße?

Et künnt jo och sinn, dat mer unger dä vier sin, die emmer em Einsatz sin för ärm Lück, die sich vielleicht möhe, andere Minsche zo Jesus zo brenge:

Lück em Hospiz, Krankenhussdeens, als Katechete för uns Pänz. Chresteminsche, die andere Freud maache im Fasteleer (z. B. Musik mache un singe).

Ich denk, nit zuletzt och die, die andere (en Noh un Fähn) mit ner Kätz un enem stelle Jebedd för Jesus hinbrenge (he off zo sinn!)

Wan mer hück Helliye Mess fiere – es dat wie en jroße Kätz ansteche

- för all die, vun dänne mer jesproche han
- för all die, die Fastelovend feere
 - vielleicht - domet och manchem widder op de Bein helfe
- för all die, die och hück ihrlich sage: Ich verjevven dir
- för all die, die em Jeis vum Minschesun ihr Metminsche levvenswert finge un Freud zospreche.

AMEN